

感舊集

感舊集卷七

漁洋山人選

德州盧見曾

神傳

余

懷

二十四首

懷字澹心別號鬢持老人福建莆田人有味外

軒橐

漁洋詩話余澹心居建康常賦金陵懷古詩不減劉賓客謝公
數云云孫楚酒樓云云雨花臺云云勞勞亭云云順治辛丑寄

子廣陵余答詩云千載秦淮水東流繞舊京江南戎馬後愁殺庾蘭成
鍾阜蔣侯祠青谿江令宅傳得石城詩腸斷蕪城客 本事詩小序澹
心留寓南中徵歌選曲儼如少俊梅邨贈言有石子岡頭
聞奏伎瓦官閣下看盤馬之句過江風流應復推為領袖

褚河南書枯樹賦歌爲孝升作

涼颼颼山鳥呼丹青滿堂招酒徒烟黃露白木葉下
芙蓉晝泣三千珠主人好客思芳草金鐙玉案供潦倒
湖海風塵濁酒杯江南楊柳新亭道昨夜楓林叫鳳凰

朱簾宛轉明月光庭梧欲作瀟湘雨岩桂先催建業霜
牀頭鮫胎瀉秋水寸絲尺絹雲霞起就中一卷索題詩
六朝詞賦初唐字平生蕭瑟庾子山婆娑枯樹動江關
樹猶如此嗟何及繁絃急管天應泣臨池者誰褚潭州
詰偃瘦健拔老湫銀鈎鐵畫更嫵媚行閒自帶英雄氣
當時歐虞八法工文皇睿賞君臣同豈知牝晨亂天紀
鬚眉竟向蠻烟徙好書此賦十本餘漢南搖落增欷歔
古人氣韻今人得咨嗟坐臥忘頭白今宵沈醉太常齋
飛箋擘軸皆奇才嗟余坎壈填溝壑十年夢到屏風腳
哀歌夜半風雨來悽愴江潭淚雙落

偶成

風雨十年夢乾坤一病身已知隨燕雀莫問畫麒麟太
白非因渴陽烏不照春桃源空有路無復避秦人

長千秋興

夕嶂偏增翠殘陽遠送行砧聲隨落葉笳吹滿歸城野
水今年濶鄰雞昨夜鳴躊躇征戰地重見古人情

和陽炯伯見贈

種瓜何地是青門愁見濛濛八表昏芳草故都春閉戶
落花寒食夜開樽荒雞鳴處誰能舞舊燕來時我尚存
雨後不知山徑滑遲君雙屐印苔痕

謝公墩

高臥東山四十年一堂絲竹敗苻堅至今墩下蕭蕭雨

願舊集卷十
猶唱當時奈何許

孫楚酒樓

江南城西酒樓紅無數楊柳迎春風孫楚去後李白醉
千年不見紫髯公

二十四航

古航蕭蕭日暮雲古航愁殺大將軍錢鳳何人敢不飲
二十四航空煨燼

朱雀航

紅旗曾挂大航西日暮蕭蕭疎鳥啼野火閒雲空滿地
橋邊風雨夜淒淒

雨花臺

雨花臺上草青青落日猶銜木末亭一綫長江三里寺
千年鶴唳九秋螢

勞勞亭

蔓草離離朝送客驪駒愁唱新亭陌夜深苦竹啼鷓鴣
空簾獨宿頭皆白

帝王廟

帝王將相一杯酒落葉啼烏霜滿檐祠廟英靈今在否
鷓鴣飛去月纖纖

陳三品石

陳宮花午夕陽開三品官從輦道來一自韓擒兵入後
至今白石生蒼苔

夜泛胥江

月色照吳縣盈盈江上花寒雲送歸雁遠浦動樓鴉暮
笛長吹客春帆早別家不知芳草路來往是天涯

返櫂山陰道上

昨夜柯亭笛閒吹向夕陽殘花隨片雨舊樹老千霜世
亂難乘興途窮只望鄉酒船空載月拂袖過滄浪

登臥龍山

薄暮登山阜寒烟帶雨痕竹梢三里寺桑葉幾家邨遠
浪搖江島長蕪入縣門舊時王謝宅今日只啼猿

高樓對酌愴然有思

建業千尊碧不知春復秋平生惟獨往茲夕喜同游天

地心歸處古今人倚樓
名山支手板百尺聽江流

吉山夜宿

殘雪積巖阜暮鐘來寺門
犬吠白雲徑馬嘶黃葉邨
山尊聊可醉旅夢不知喧
前路崎嶇甚寒流落屐痕

遠遊詩

衡嶽閒游遇懶殘至今煨芋未曾餐
山人何事輕衣紫笑絕桐江一釣竿

紛紛花柳映沙隄豈有千金購馬蹄
痛哭江陵張相國孤墳猶在洞庭西

一不江水謝東山賭墅蕭蕭渾是閒
莫怪老僧頻捉鼻也曾譚笑到人閒

雨中集飲周忠介公蓼菴與如須懷舊作

雲旗一片遶西臺鐵笛橫吹第幾回
茂苑花開堪過日寒山鐘斷好銜盃
雄心視轍收三敗老淚衝河賦八哀
悵望美人臨北渚自騎天馬渡江來

贈曹秋嶽

野田漠漠楊花飛老我孤雲無所依
漂麥自傷爲學苦割羶莫歎知音稀
吳宮秋井舊深淺漢苑春風今是非
一笠一瓢可憐子櫻桃已紅胡不歸

自松陵至檣李舟中雜詠

一河春水漲桃花小艇隨風日未斜
蝴蝶紛紛滿芳草獨憐遊子不歸家

和阮亭冶春詩

銀柱琵琶鐵笛仙
茂林修竹聚羣賢
幡飛鳳子東風軟
汴水西流二十年

方文

三首補遺一首

文字爾止號僊山
江南桐城布衣戶部郎中大

鉉之子有僊山集西江遊草

漁洋詩話方僊山居金陵少有才華晚學白樂天好

作淺俚之語為世口實以己壬子生命畫師作四壬子圖中為陶淵明次杜子美次白樂天皆高坐而已偃僂于前呈其詩卷余為題罷語座客曰陶坦率白令老嫗可解皆不足慮所慮杜陵老子文峻網密恐僊山不免喫藤條耳一座絕倒分甘餘話僊山有詩云烏衣巷口多芳草明日重過是早春亦佳句池北偶談亡友方爾止瀟灑有天趣每見人誦詩者輒為竄改其人不樂亦不顧也然退未嘗不稱其長而掩覆其短余以此重之明詩綜潘蜀藻云爾止詩陶冶性靈流連物態不屑章縫句繪閒有率意之作頗為學者口實不知皆嘔心刻臍而出之者也詩話爾止閒作可笑詩句頗為時抑揄然如嘉穀登場或春或操杜糠終少于粒米愚山集西江遊草序近之論詩者惟尚聲調嘈

吟氣象軒朗取官制典故經圖勝蹟綴輯爲工稍涉情語皆以降格
于是前可移後甲可贈乙郭郭雖雄中實樊陋爾止爲詩雖民謠里諺
塗巷瑣事皆可引用與會所屬衝口成篇故其詩欵
曲如話真至渾融自肺腑中流出絕無補綴之痕

喜遇陳印倩處士兼懷陸麗京梯霞

廬陵自古溪山好尚有梅花冷暖殊爭似錢塘陳與陸
枝枝葉葉是林逋

遇鄉人

君從石城來曾過青溪否我家傍青溪門前數株柳

題半山道人畫冊

一著袈裟絕萬緣猶餘破研習難捐江山本是無情物
寫到荒殘亦可憐

題酒家壁

補遺

問我來何數非關飲興豪風塵燕市裏或恐有荆高

胡

介十首

介字彥遠浙江錢塘布衣有旅堂詩集

漁洋詩話
胡彥遠布

衣食貧而妻與女皆能詩順治中遊京師送人南歸云帆檣
楚國羣鳥晚橘柚吳天一雁晴與淮陰邱曙戒季貞兄弟善

按彥遠有投吳梅邨被徵入都詩四首海外黃冠舊有期難教遺老散
清時身隨杞宋留文獻代過商周重鼎彝滿地江湖傷白髮極天兵甲
憶烏皮重來簪筆承明殿記得揮毫出每遲幕府徵書日夜催官開碣
石待君來歸心更度桑乾水伏櫪重登郭隗臺花萼春迴新侍從風雲
氣隱舊蓬萊暮年詩賦江關重輪卻城南十里梅二尊雨雪坐冥濛人
在汪洋千頃中老驥猶傳空冀北春鴻那得久江東榛苓過眼成虛谷
未忝關心拜故宮我亦吹簫向燕市從今敢自惜途窮碧澗黃塵事有
無此來風雪滿燕都遺京節度新推轂盛世朝廷倍重儒花暗風池思
劍珮春深虎觀夢江湖悲歌吾道非全泯坐有荆高舊酒徒又彥遠妻
翁桓字少君重過西湖詩云風風雨雨烏空啼草綠山腰水滿隄畫閣
已傾歌舞散十
年重到六橋西

送顧庶其南還并訊茂倫諸子

離堂尊酒恨難平久客何堪送客行落日自傷遊子意
殘年倍有故鄉情帆檣楚國羣烏晚橘柚吳天一雁晴
歸訊江城隱君子幾人雨雪憶劉生

康山謁忠臣廟

康山無恙太湖濱廟貌忠臣血食新官渡夜濤驚隔代
老松古殿暗經春支離天地常爲客慘澹風雲各有人
躑躅荒庭銅狄恨羣公應有淚霑巾

題露筋祠

淮南淮北臥熊羆建纛開藩十萬師虜策一聲齊捲甲
大家回首露筋祠

感懷詩

庭鶴不自得步影心悠悠本是雲霄姿馴人耳目求餉
我一握粟令我失滄洲歛翮發清嘯寄聲謝同儔清苦
有餘樂行矣毋自讐

人生如馳景況與憂患居曉月耿天上夕陽流前除初
聞蕙蘭香當門行欲鋤早歲騁志節顧盼已無餘何當
向屋坐塊若枯池魚仰面語日月爲我立踟躕龍飛易
爲潤其下鮮蘧篠不然高鴻冥凌風遊太虛安得欸段
馬結束在鄉閭

埭雞警當曙老馬識路歧蟋蟀候十月自來親牀帷夜
聞蟋蟀鳴小物亦知時如何青雲器獨坐理亂絲戶外
賊橫陳抱書向經師子陽井底蛙邊幅以自持鹿門識

時務牀下伏奇姿班世褒儒雅超獨蕩滌之好女在中
閨好男在驅馳

結髮爲君婦奉君懼不終解珮綰君帶爲君戒淺衷君
子崇令德心如春融融戴勝降于桑鴉鳩亦翻風崦嵫
匿炎暉蘭膏耀清宮所以大人龍蛇遊其中我懷蘭
相如後有陳仲弓寥寥千載上俛仰鑒微躬

早歲抱壯心輒軻守微節蕭蕭菰蘆中孤居晤明哲古
人愛獨往豈復留車轍擁書常等身微言或幾絕始知
名姓書不爲英雄設五經表有人對之解鬱結懷中一
刺橫三年成漫滅

家有昆吾劍其氣如圭璋沈淪古獄久川瀆蘊奇光風

雨嘯空壁月中飛青霜乃知古名器皆有神明藏如何
萬古心相視爲文章破劍作耕刀鐵存而劍亡

大道喪千載昔人所同悲蒙蒙輪鞅塵新陳代相推峨
峨鳴劍珮燁燁擣華辭鳴鐘擊雙轂意氣傾一時如彼
遠行客日日行路岐榮名汨民秉鑒畧矜等夷假寐昏
旦中冥然已無知何必臨化遷惆恍難自持

龔

賢

七首

賢字半千別號柴丈人江南上元布衣有草香

堂集

愚山集龔半千像贊人推詩老自稱柴丈名不可逃
俗不可向尊酒陶然筆墨天放投迹岳中寄情霞上

按半千工畫愛做梅花道人筆意常自寫小照作掃落葉僧
狀因名所居爲掃葉樓顛倒用小印二於幀末而不署名

扁舟

扁舟當曉發沙岸杳然空人語蠻烟外雞鳴海色中短
夜曾去國白首尚飄蓬不讀荆軻傳羞爲一劍雄

江上夜歸

身老愁爲客迢迢返舊京扁舟無處宿中夜趁潮行月
落草堂寺烏啼石首城酒醒殘夢斷回顧不勝情

久不得韓畱消息

平生好遊歷此別日偏多嶽寺聽猿住江鄉傷虎過衰
羸吾自念疾病爾如何短榻依然在空房鎖薜蘿

胡介再過邗上

相逢知不易一拜淚潛然此地又春草吾生俱暮年囊
空出詩卷厨冷動炊烟耆舊今誰在尊前各自憐